

59.253 甌東補二十卷
 玉海樓抄本
 共陸册 存陸册 排架号 00347

滕幼學台人宋末為樂清館頭巡檢霞漢滕氏宗譜

元故大司農浙江宣慰使義興真定人在浙破山賊柳分

司眾七千括蒼陪婁蒙才楊鎮龍眾五萬東陽摧俞高眾

五千紹興殪詹老鴉林雄劉甲一眾數萬温處間最一時

柳待制文集

元温州路總管治中湯全平陽州判官湯鈞俱麗水人宋

文集

永嘉項昕父止堂客死遵治命火化于杭之七寶山後函

骨歸葬餘姚初止堂試瑞安有尹喜之妻為勢家所奪止

堂以理法不可為金屈遂直其寃戴九靈文集

元大司徒宣政陳景彥曾孫太夫人舉家被擄宣政甫十
歲同弟嘉孫至京師近侍以聞及入見世皇愛其骨相異
常童有詔給事裕皇且命撫養之居無何帝師吃刺思授
以密秘經論洞若夙習通解諸番譯語然有至性雖歸依
佛乘而默訪庭闈廿年之久無所不用其極或傳在順州
卽以金馬名幣遺之迎侍而歸一時文人競作詩歌備紀
其事朝野榮之至大延祐間五降璽書大司徒印章領土
番宣慰使嗣因母夫人故于蘭谿州創起佛寺與兄弟還
聚以終

劉賡永嘉陳氏世德碑

陳景彥幼穎悟一目數行俱下名重縉紳問遺殆無虛月

里社浮沉未嘗一入城府君隱以終嗣以曾孫輩真吃刺
思貴贈中奉大夫諡安惠

全上

陳春資集賢大學士諡恭僖與景彥並封永嘉郡公自中
大司徒上柱國追封溫國公諡康順

全上

真臘國在占城之西南元成帝時遣永嘉周達觀招諭之
往返一年半悉得其國之風俗道里海物土產一一紀焉

名曰真臘風土記

郎仁寶七修彙稿

元吳荃瑞安人柳州教授

宋景濂文集

飛雲渡每有覆舟之患有一少年放縱嘗夢神示曰汝壽
止三旬且不得其正死于是自謂不久人世不娶妻不事

生產輕財仗義爲志嘗俟渡見一女子徘徊悲戚若將赴水急止之問其由曰我本人婢主人有姻事借親串珠耳環直鈔三十餘錠今送還于中途失去不能歸寧死耳少年曰我適拾得其顆數裝束悉確遂同造主人謝贈以資不受既而主人怒此婢遣嫁業梳剃者所居去渡咫尺期歲少年將過渡道遇婦人拜且謝即失環女也因告于夫強留午飯俄風濤大作先登渡者悉溺焉蓋少年能救人而造物者以救報後少年以壽終渡在温州瑞安陶九成輟耕錄

元聞人逸孫金華人温州儒學教授

宋景濂文集

楊繼可天台人泰定間授瑞安州學正

天台志

元周文敬字敬之吳縣人平陽州吏目

吳縣志

林應雷黃岩人天歷間陞瑞安學諭

太平縣志

葉居暹平陽州學正鄭濬司教樂清有雁山詩

太平縣志

崔英真州人至正辛卯以父蔭補永嘉尉

前燈餘話盧陵李禎芙蓉屏記

元延祐初永嘉滕穆赴杭科舉日遊湖山月夜入聚景園遇美人名衛芳華自稱亡宋宮人相與吟詠並交會焉明日往訪園側果有衛墓在暮又赴會因遂携歸鄉里後又當鄉試偕以赴杭仍往聚景園俄以緣盡別去以玉指環繫生衣翌日滕具祭墓下作文弔之歸後終身不娶入雁蕩山採藥不復還云

瞿佑剪燈新話

漢按聚景園記說郭紅樹樓詞選並載之娓娓千四百
餘言今彙括之如右聊備異聞之一覽

温州某監郡一女及笄貌美性慧父母甚鍾愛以疾卒寫
其像歲序張設哭奠任滿忘取像去新監郡復居是室其
子未婚忽得此心竊念之日懸臥室一夕見女下於軸叙
殷勤與好合踰半載形狀羸弱父母詰得其故教以女來
以餅餌力勸其啖既不女不獲辭為咽少許天明竟不可
去宛然人耳特不能言耳遂真為夫婦病亦愈矣此事余
少聞之熟習不能記兩監郡之名爾

陶南村
輟耕錄

薛玘終平陽州都目卒于任珩象山教諭琦漳州路學錄

永嘉梯雲
薛氏譜

薛濤字景山泰定間欵節御史福州教授遷太常寺奉禮
部除莆田丞瑜温州路儒學訓導

上全

薛濬字德深集賢以氏名聞特著清隱處士至元中卒永
嘉教授許士龍狀其行

上全

帝師殿在華蓋山麓元時敕建

柳待制
文集

元黃鐘天台人通判温州軍

台州
府志

趙叔敬至順元年令永嘉

柳待制
文集

楊思順至正間任温州路同知

台州
府志

鮑與儔字錫侶黃岩人元温州路總管

黃岩
縣志

樂清縣僧祖傑自號斗崖楊髡之黨無義財既豐遂結托北人往永嘉江心寺大刹也為退居號春雨庵華麗殊甚有寓民俞生充里正不堪科役投之為僧名如思有三子其二亦為僧于雁蕩本州總管者與之至密遂托其訪美妾既得之傑以其色遂留而蓄之未幾有孕眾口藉藉遂令如思長子在家者娶之焉然亦時往尋盟俞生者不堪鄰里嘲誚因挈其妻往玉環以避之傑怒俾人伐其坟木以尋衅俞訟于官受杖訴之廉司傑又遣人以弓刀寘其家而首其藏軍器俞又受杖遂訴行省傑復行賂押下本縣復受杖意將往北求直傑知之遣悍僕數十搶其一家

以來二子為僧者亦不免用舟載之僻處盡溺之至剝婦人之孕以觀男女于是其家男女無遺焉雁蕩主首真藏叟者不平越境擒二僧殺之發其事于官州縣皆受其賂莫敢誰何有印僧錄者素與傑有隙詳知其事挺身出告官司則以不干已却之既而遺印鈔二十錠令寢其事印遂以賂首至是官始疑焉忽平江錄事司移文至永嘉云擬俞如思一家七人經本司陳告事官司益疑以為其人未嘗死也然平江與永嘉無干而錄事司無牒他州之理疑益甚及遣人會問于平江則元無此牒此傑所為欲益彌彰耳始移文巡檢司追捕一行人巡檢乃色目人也夜

夢數十人皆帶血泣訴及曉而移文已至爲之悚然即欲出門而傑之黨隨至把蓋而賂之甫開尊而瓶忽中裂有聲如裂帛巡檢恐而却之及至地所寂無一人鄰里恐累悉逸獨有一犬在諸卒擬烹之而犬無懼狀遂共逐之至一破屋嗥吠不止屋山有草數束試探之則三子在焉皆惡黨也擒問皆不待撻楚一招即伏辜始設計招傑近兩月餘始到官悍然不伏供對其中有僧普通及陳轎番者未出普已賫重貨入燕求援以此未能成獄凡數月印僧日夕號訴不已方自縣中取上州獄是日傑囚上州之際陳轎番出現于是成擒問之即承及引出對傑尚悍然及

呼陳證之傑面如土色陳曰此事我已供了奈何推托至是始伏已行申省而受其賂者尚玩不行後衆言難掩遂斃之于獄越五日而赦文至夏若水時爲路官其弟若木

備言其事

癸辛雜識

至元丙子溫處副使伯篤魯丁率掾馮迪何崇禮新修石

門書院

柳待制文集

尹恂會稽人元溫州路平盈庫副使歿于溫

宋景濂文集

李焱永嘉人字德光元天歷二年任麗水教諭

處州教官題名碑

永嘉薛君海有書柳待制貫上京紀行詩卷

宋景濂文集

棗仁壽字樂山元至順時爲瑞安州學正興復學田勒碑

州學丹陽縣志

永嘉沙門道衡俗姓葉祝髮于鎮江之金山禪教二書靡不畢通著禪海集蓋取馬祖禪歸海之語也戴九靈文集

元浦道吾同知温州路總管府事能務舉廢之術宦杭遂

家錢塘

錢塘西域浦氏定姓碑

青田清溪觀古有銅鐘袁晁亂後失其所在有墨書青田字人或記焉後温州島嶼山水中舟人時聞鐘聲幽咽不遠有人忽見一物如半鐘形側露水上舟近即覆觸之便沉晴霽亦時一見州寺僧綵舫幡花致齋迓之或道場經懺而請稍得見之道門亦備香火以迎均不獲清溪道

士時有與迎鐘者于眾中稽首祝之曰清溪觀無鐘多年極是缺事遠地不辨香火丹心而已鐘若有靈願泝流自往某先歸于觀前祇候眾聞其說皆笑之道士歸青田鐘已在觀前潭中焚香拜迓汎汎就岸重千餘斤挽拽懸掛若百許斤爾自後時亦飛去旬日却迴道教靈驗記

温城淨光塔雄鎮一方年久將壞方叅政初成其城欲賦民錢葺之逆川師請為定戶捐米師乃陶甃掄材鎮心之木長一百五十尺最難致之師談笑趣辦七成既粗完其下仍築塔殿宏敞壯麗九斗之勢益雄一旦颶風作其上

一成挾入海濤眾咸傷之師持心益固遣徒如閩鑄露盤

輪相及皎珠之類一一就緒糜錢過十萬而工役弗與焉
平章燕只不花鎮閩道過東甌夜觀塔燈熒熒知師所造
乃謁師問道同載入閩後還温之日方叅政具船迎之

宋景濂文集

僧益字栢堂温州人大慧果世四世法嗣得法于淨慈隱
公住慶元奉化岳林寺元詩選栢堂山居詩一編藥菴黃
僧遊廣陵得東隱精舍為元時舊刻如春暖鹿眠三徑草
夜寒雁叫一天霜棕鞋踏凍石梯滑松帚掃窻苔徑陰相
韓卿趙禪中蟲霸楚王吳檻內猿灌蔬月下擔寒浪移石
雲邊接斷橋一火燒畚春採蕨半簑披雨曉鉏園黃狢林

中偷果去翠禽籬下引雛飛格律在皎然無本之間當不

徒賞其山居高致已也

全浙詩話

永嘉張士諤贊瑟彼和氏之璧勁哉繁弱之弓

戴九靈文集

陳雷字公聲温州人寄劉仲元經歷云槐陰午衙書帙靜

蓮香秋幕吏人稀作吏如此故當不俗

顧光奎元詩選

趙大納一名良勝遷永嘉令邑計口賦鹽民以為病因建

請令富商轉售之瑞安吏何良偽為官書誣平民盜販自

殺者三人府下大納訊之獄定徙之臨汀焉州城枕大江

水暴岸善崩大納列植巨木先以其芒殺浪勢然後實以

石甃之岸凡數千丈得不壞除温台海運千戶

浦陽人物志

漢按趙大納柳待制貫集作搭納。次娶永嘉許氏忠
簡公景衡七世孫女累封浦江縣君生一子友仁一
女適永嘉尉龍泉季瑄之子而瑞安唐彥驥亦其婿
也見宋文憲公集

柴養吾永嘉人與無為吳主一會稽胡舜咨魏郡邊魯生
為翰墨友游四明嘗推毛彝仲為祭酒四朝詩

元至元間永嘉周介人妻蔡氏夫亡年甫二十餘矢志柏
貞鄉閭舉之永嘉周氏宗譜

河南江北行中書省參知政事姚忠肅公天福字君祥平
陽人至元十一年拜監察御史彈擊權貴無所顧畏世相

賜名巴而思國言虎也後條奏宰相阿合馬罪二十有四
召廷辯公枚數之彼輒引服數至於三氣沮色喪上曰此
三者罪已不赦因目公曰巴而思臣下有違太祖之制干
朕之紀者汝抨擊無隱廷臣皆震悚時方倚相理財姑釋
不問眾人莫不為公危之公之太夫人有賢識勗之曰為
國者忘其家汝第盡力效忠果不測吾追蹤陵母死日猶
生年也公泣謝因白其長曰萬一得譴乞不以老母連坐
語聞上嘆曰是母子有古義烈勅侍臣符寶郎董文忠宣
付史館書之輯耕錄

元何龜壽字德昌號半溪封贛州興國縣尹永嘉方川何氏宗譜

三寶柱字廷珪色目人練達吏事剛正有守輟耕錄

漢按三寶柱嘗官溫州路達魯花赤故錄之

陶宗儀字九成其先由閩之長溪徙永嘉陶山再徙台之

黃岩師永嘉李孝光江陰孫次知陶宗儀傳

至正中著作郎李孝光進李公麟所畫孝經圖一卷順帝

詔危素逐章補書經文危太樸文集

漢按是圖明初入晉王邸見晉王傳

黃巖方行以元義兵萬戶守昱關與明兵再戰不利退守

札溪題怪石落花一聯于石壁遂自刎永嘉孔從善為足

成之云萬里西風起馬蹏金戈回日塞雲低未為豫讓先

亡趙欲效田單獨報齊怪石有痕龍已去落花無主鳥空

啼至今天與英雄恨嗚咽泉聲下札溪元詩選

覺初禪師出世建業之聖泉遷永嘉雅山嗣江心虛席牧

守以為古叢林昔思陵駐蹕地名列江南十刹須延致覺

初住持會洪武登極置官統領僧教詔海內名山悉隸掄

選而統領亦合羣議仍請覺初居其職宋景濂送覺初禪師還江心寺序

元江心慧恩大慈禪師傳大天界寺享中信公法稱為上

首宋景濂文集

陳秀民字庶子溫州人一云嘉興人張氏時為參軍歷江

浙行省中書省參軍不知所終全浙詩話

漢按志載秀民至正中知常熟與詩話所稱官爵不同
且仕於張氏則偽職也其舍元官而轉就此乎詩話
蓋引元詩選周元初鶴林集載庶子作來鶴詩在洪
武已已則知其明初尚在也又攜李詩繫庶子詩風
度邁人當張氏據平江部將呂珍守越秀民與饒介
之在左右一日陳賦詩寄呂有不驚越女之句饒爲
書扇詞翰雙絕呂倩人誦罷大怒曰我爲主人血戰
守封疆豈愛一女子不忍驚乎見則必殺之陳基有
寄陳庶子參軍兼簡饒介之郎中詩云楚天漠漠水
迢迢千里懷人不自聊帷幕喜聞延曲逆行間忝竊

事嫖姚江空不採芙蓉寄歲暮惟歌桂樹招華蓋仙
人如借問爲言髀肉近多消

陳秀民爲張士誠爲浙江行省參政翰林學士有寄亭集

明詩綜

庶子僑居于禾朱漢翔纂樞李英華集以其詩壓卷

靜志居詩

話又庶子至武岡詩家居猶旅舍兒子復南征婁縣千
江隔都梁百日行雁書天外遠烏角夢中生食祿非吾願
何時復舊耕

陳遇字仲行金陵人元時江東明道書院山長教授温州

元季兵興歸里

立齋閑識

永嘉民有弟質珠步搖于兄者兄妻愛之給以亡於盜屢
訟不獲告時海寧主簿胡長孺有政聲因往告焉長孺曰
爾非吾民也去未幾方治盜長孺啖盜誣兄受步搖賊爲
逮兄赴官力辨數弗置長孺曰爾家信有是何謂誣焉兄
倉皇曰有固有之乃弟所質者趣持至驗之呼其弟示曰
得非爾家物乎弟曰然遂歸焉

元史胡長孺傳

瀟湘八景圖不知何人作乃元進士哈珊沙家物跋言至
正己亥括城之變倉皇避地舟覆惡溪此卷乃獨全遂贈
同年陳用中

孫退谷庚子銷夏錄

漢按志載安溪一名惡溪草木子至正乙未青田寇起

哈珊沙避地或當是時歟。考唐書地理志處州麗
水有惡溪多水怪刺史段成式有善政水怪絕民謂
之好溪蓋是時永嘉屬括州故耳又舊唐書韓愈傳
過海口下惡溪濤瀧壯猛難計程期張子容詩云水
共惡溪連今沈觀察愷彝溫溪待潮詩灘多未許客
兼程怪道溫溪有惡名似卽以溫溪爲惡溪矣太平
寰宇記惡溪道間九十里而有五十九瀨兩岸連雲

高巖壁立按處州府志海口屬麗水縣境

元余德祖德興人溫州城時有箕仙甚驗適問他事題詩
元胡仲淵提兵取溫州城時有箕仙甚驗適問他事題詩
云金甲霜寒已十秋喪師感國盡虛謀西風不作封侯夢

此老安能正首邱讀者不知所謂因詰之曰此贈胡參軍也次年胡移兵取建寧為參政陳友定所擒磔于福州草木子

陶復初字明本號介軒天台老人官樂清縣尹師李薊正

父子畫墨竹及着色竹甚工亦能山水

圖畫寶鑑

王銓字伯衡安仁人登進士歷温州守方寇陷城銓公服坐堂上寇至問何不去銓曰方州大臣宜與城俱亡去將何適負國托付死有餘辜但不可延累吾民吾當為厲鬼以報寇不忍殺乃以言激怒引領受刃死

元史補遺又續宏簡錄

按饒州府志銓被執不屈死其女聞之亦抱子赴水死

林邦福字大彥溫父也初署常山尉歸浙省左丞擢為鄉郡知事時山寇竊發掠慈湖將窺城上下洶洶乃白府單舸走賊策諭以禍福皆俯首退去為良如初有司上其功尋以疾卒葬永之建牙鄉

宋景濂文集

林常溫弟也泉州德化縣尹次嘉福寧州知事次寧行宣政院宣使

上

林溫生于延祐丁巳八月八日至三歲名榮祖十二歲更名溫又十歲當至正壬午以春秋經試江浙鄉闈第一董彝第四董朝宗第五朱公遷第二十八溫授奉化州學正丁亥之官會董彝亦為慶元學正彝曰吾大父昔得奇夢

記諸籍云丁巳年九月七日夜夢林温作魁朱姓人鎖榜
第四第五人姓董其最異者温生甫一月耳

陳士元夢林元解

漢按宋潛溪集亦載此事

至正十四年青田吳德祥嘯聚唱亂處温婺均被其毒害

處州總管葉琛征勦之十八年九月平

明史葉琛傳

胡琇龍泉人元樂清縣尹

明史胡琛傳

元林成之名伯生平陽人篤實好學有士行以茂才貢上

舍擢侍儀舍人

宋景濂文集

陳道常字大中通周髀法與劉伯温友善元左御薦為温

州路樂清瑶畧巡檢

太平縣志

周夢熊字文兆仕元桐鄉教諭擢潞安某縣令明兵至以

死守後繫入京應天府守皇陵

永嘉周氏譜

元鄭信深州人與妻王氏寓温子誠字文質為娶于温之

賴氏先本汴人南宋有仕于温者遷焉信自裏陽河巡檢

遷廬之稅課使因徙居合肥信歿返葬于深王氏繼歿誠

亦以哀毀終賴氏守志五十年教子成名官太醫院判壽

八十而卒

宋景濂賴氏傳

元葉某温州人至大間教授建昌代胡長孺任

劉水村泯稿

明王之屏字汝藩號介石穎州人嘉靖乙丑進士令永嘉

有惠政升建昌知府

建昌志

饒鉅温州經歷 鍾則韶以人材薦任浙江平陽縣

劉日新洪武二十六年舉人温州教授

黃相嘉靖貢生永嘉主簿

王維夔永嘉人隆慶進士任南城令

萬倉實以子華貴贈平陽知縣上官昂贈瑞安知縣以上南成志

天台劉仁本佐方谷珍謀議朱亮祖克温州被獲維時温

亦為方氏所據仁本其寓吾温乎考宋景濂序方行詩集

以方谷興據慶元姪明善據温授江浙行省平章方行字

明敏据此則仁本在温或為明善故未可知也從明詩綜中摘來

洪武元年倭奴入寇浙江沿海郡縣皆失寧左衛指揮使

毛讓會浙江兵平之宋景濂集

祝大明麗水人初名大明入明避國號改之以處州司獄

改永嘉鹽場司丞歲終課增倍都轉運司才之俾督隣邑

五場有能聲宋景濂集

明初温州茗洋周遂卿恃山險常為寇鄰邑皆患之而郵

傳之通平陽瑞安者亦為所要遮御史中丞章三溢命子

存道合平瑞總督孫安之兵擒遂卿斬之明史章三溢傳

漢按宋潛溪集章公神道碑銘載平寇事又云朱亮祖

取温州公調何世明以軍從温州平公聞其掠人子

女命鎮撫林理徵之各部送還其家先是温州黃宗

雲朱君達來附各授以元帥之職還守其土及王師
征溫失利輒叛去溫既平達又請降公奏戮之

洪武十五年處州吳連三梗化蔓党平陽焚劫為患劉賢
率子間道走白閩帥陳利害及勦戮計因命為前驅寇平

賢與有力焉泰順高陽劉氏宗譜

李奕字宗表其先汴人元末徙居錢塘明初以薦官國子

助教以病免初從永嘉胡僖遊奇其才妻以女金華詩錄

薩都拉天錫雁門集有送鄭天趣進柑入京詩白髮叅軍

門不出黃岩老叟肯相過九重玉石常年進千里金柑細

馬馱綠水青山南郡遠毳袍貂帽北風多同年若問儂消

息為說愁來奈病何注按蘭谿吳景奎葯房樵唱有哭鄭

伯容詩注云永嘉天趣幼子是天趣永嘉人也

茅山志林大敷號紫軒又號木通生永嘉平陽人玉海蔣

宗師遊浙東從入山至元丙子歲許宗師度為徒嗜酒

不羈行步不疾而速徧遊五岳諸名山晚就元洲精舍

築壇把茅居之大德戊戌歲二月十八日徧辭交舊言

將東歸明月坐茅龕中焚香誦洞經忽犬聲喝去守庵

驚視之見危坐火光中經聲不絕頃之地無遺骨空有

祥雲法所謂火解眾方歡异適薛道民者自揚州回言

遇先生于瓜洲繼數出入人間附信山中又元薩天錫

雁門集茅山元洲精舍有道士號紫軒又號木通生白
日坐解遺書其徒薛道民者至今坐墻尚存爲題其卷
詩云白日飛昇凌紫烟靈書猶許道民傳元洲精舍無
多地夜夜火珠光燭天按句曲外史集元洲偈和十絕
句序云茅山元洲精舍左右真仙古蹟曰菡山羅姑洞
霞架海鶴臺桐華源元洲精舍紫軒火浣壇隱居松玉
像龕

桑乘補卷之五

東嘉黃 漢鶴樓纂輯

顧仲瑛輯元耆舊詩爲玉山雅集中錄高則誠作稱其長
才碩學爲時名流可知則誠不專以詞曲擅長也

靜志居
詩話

漢按高則誠瑞安人見元史府志選舉志相符而文苑
傳作平陽人宜改正

瑞安高則誠明少辨慧善屬對年六歲父會客明從桌邊
竊會客曰令郎捷對敢請試之曰童子不知道理上桌竊
食對曰村人有甚文章中場出醜客又曰細頸壺兒敢向
腰間出嘴明曰平頭鎖子却從肚裏生縑及長下筆成章

堅瓠集

錢塘中竺湖州道場温州江心等為禪院十刹又錢塘上

竺下竺温州能仁等為教院五山

七修彙稿

張馮瑞安人以文學薦擢奉常贊禮郎

宋景濂文集

高遜志入史館與修元史

元史目錄

國初修元史者前後凡三十二人皆天下之極選而出于

吳者五人高啟傳著王彞謝徽社寅而陳基高遜志皆嘗

寓吳考禮者十人楊基鄭元錢逵皆吳人而張紳余堯臣

姜漸亦皆寓吳

都公談纂

漢按余堯臣字唐卿以文學著而與考元史典禮本志

夫載高遜志嘗流寓樂清

高遜志靖難後死永嘉山中

高之門人蔣兢祭高士敏文以士敏于壬午九月晦卒于

東甌雁蕩山中時兢亦竄逸茲山窮途無以成禮因乞樵

叟朽腹之巨木斂而葬之芙蓉峰下。蔣翹之族譜載兢

文。靜志居詩話蔣朱竹垞友。兢宜興人徙嘉興建文中

天淵閣侍書

姜立綱永嘉人太常卿楷法嚴整畫學黃子久李君實筆

談云余偶得太常一幅蕭疎爽秀全以黃鶴山樵為宗特

筆意稍未化耳題句云功名已見綉為衫萬里青雲入笑

談回首九峯天際碧可能無夢到江南詩無聲

姜立綱七歲以能書命為翰林院秀才書史會要

黃璨字蘊和柳楷字文範俱永嘉人宣德間直內閣詩文書畫並皆佳妙上全

漢按圖繪寶鑑柳楷號萬竹山人與姜廷憲同官廷東

溪又黃璨作黃燦桃溪雜稿台人吏部郎中黃孔昭

其弟孔英往省將歸永嘉黃評事燦為作雨窗別意

圖一時朝士題詠甚眾楷本志作瑞安人

國初永嘉有張子李女比鄰幼結婚及長張母寡貧李謀離婚女不從一日女元宵觀燈張即捨伴從張訴衷知婚

無合期行至橋上相抱投水無知者次年長蓮花並頭連

蒂人皆駭異募人掘根得二屍蓮莖各出一口即張子李

女也邑令以其不失貞義合棺題石名曰鴛鴦題橋曰雙

蓮當時有詠其事曰初盟不負鐵心堅割斷塵緣作水仙

烏鵲巧催橋上度青蛾長展鏡中妍生前果墮相思樹死

後花芳並蒂蓮何處宰官身可見幻鬢嬌小愛河邊種書堂校

列集
異編

湖府經歷葉伯旼世居永嘉城中旼獨結廬蜃江之北茅

簷竹扉僅蔽風日名之曰水北山居日與友携酒出由白

鹿城登華蓋持杯浩歌聲振林木或垂釣江中或行吟夢

草堂詩句不逼古人不欲休宋景濂水北山居記

良鄉丞陳謙益仲東甌人也嗜學弗倦慨然有志于事功

陳翰林元達以飛白書其懋止之堂曰耘菴全上

瑞安裴中季和以學行推舉典簿成均遍其軒居曰著存

不忘乎親也劉君伯温嘗為賦詩以寫其情予復為琴操

三解使季和援琴歌不成聲益孝思果有終極否乎宋文憲公文集

明朱君美黃巖人通判温州黃岩縣志

林仁棐字公佐黃巖人温州學錄全上

滕謙字咸吉年三十棄文就武隨征効力頻建功績授陸

涼衛指揮戰白溝河陣歿贈忠烈霞漢滕氏宗譜

漢按前明靖難時有白溝河之戰沒亡官軍甚眾見明

史滕謙戰沒是否即當此時俟考

林文定五馬里人官知縣女適舉人曾氣永嘉曾氏譜

漢按林文定郡志選舉人物俱無載或另有本名而文

定為其字歟俟考

曾勗嘉靖壬午恩貢廣西布政司理問轉黃州司李娶永

嘉李階女全上

漢按曾勗郡志入例貢轉官亦不載茲曾譜載為嘉靖

壬午恩貢必有所據

曾鵬正德丙寅恩貢授山西布政司理問全上

曾子侍字鳳海有才幹以邑掾為縣令莊公廷激所重考
滿選廣東巡檢署香山縣事上全

劉大夏温州人宏治壬子登第官左布政使萬歷野獲編

王子揚激桂見山閣老識其賢而進之項喬文集

永嘉尹李丕顯治水利築埭惠民不為三年之計瞿溪上

下十數萬之田宅永有嘉賴上全

阮參政存資業甚富出仕之後田土大半易錢以供官費

四川滿考來京屬官有餽遺飲食路費却之一無受何文淵集

阮紹咸云宋有阮存郡志諸科鄉薦条下註稱進士有傳

考選志俱失載而人物志亦無之此明之阮存由進士歷

官參政第宋之阮存何僅有其名而履歷皆失考或曰恐

訛一為二未知然否

獨立華洲人永樂舉人平陽訓導萬姓統譜

木森瑞安人宣德中任福清教諭上全

永嘉戴思持為太學生試事于外數年未用貧不為憂每

語生民之故輒深思長慮如切諸身扁其室曰後樂若慕

范文正之言者方孝孺後樂齋記

宣德中全椒章惠知温州平陽縣奉公愛民理繁就簡凡

百公務不差吏卒勾攝止用粉版背繪刻吏卒甲乙為次

題其版曰不貪不食與民有益人隨牌至庶免譴責人咸

信服不敢稽遲由是案牘清簡囹圄空虛

張堦息 影偶錄

薛亥字仲良郡庠生宣德八年鄉貢入太學

永嘉梯雲 薛氏譜

宣德癸丑會試值致仕大學士黃淮謝恩至京即用為主考

王崇簡冬夜箋記

長陵北征留黃文簡輔皇太孫漢庶人中以蜚語繫詔獄十年遂以省愆名集集中詩所云寶劍蘊豐城斑斕土花碧又云十年頽足園扉閒時向墻頭看柳色是也因是受知宣廟特深賜遊西苑肩輿登萬壽山冥太液池親洒宸翰贈行有云朝旭光升紫殿清相對清言良慰情留之累月不盡歸心又欲東南征雁岩峰高高不極中有謝公舊

遊蹟采芝劄苓可長年應在天南憶天北君臣相悅可謂

千載一時

朱竹垞靜志居詩話

丁輝字允明號省菴成化己亥邊塞缺馬詔天下尚義者

出金補之輝應詔捐輸例授七品散官宏治戊午捐金修

建衛署辛酉創鹿城書院又獻腴田十畝以助章元應義官丁省庵

墓誌

漢按墓誌敘衛指揮陳汝玉考郡志無其名惟有千戶

陳玉至鹿城書院之創輝尤有功于名教也

黃巖林壁官考功郎敦孝友慎結交初以詩謁永嘉少保

介庵大奇之為題梅花卷後少保薨林奉命往祭與治葬

事應志和林
無逸行述

陳茂烈瑞安人以進士任福建興化衛燕居筆記

永嘉陳廷斌家故有堂二親平昔之所親没而名之曰永

思金宦遊四方回顧斯堂雖邈隔江山而思之之切實發

寤寐宣德庚戌會于沅州請余記之薛文清公文集

弘治中浙江儒士潘辰嘉靖中南直隸生員文徵明永嘉

儒士葉幼學皆以薦授翰林院待詔明史選舉志

潘纘温州經歷又推官宮安檢校秦恕皆正統時任又府

儒學徐參徵仕郎中書舍胡宗韞俱永嘉人與黃文簡立

府署戒諭碑鄭稼堂之良記

明金寔翰墨七更序翰墨林永嘉謝君圖書之府也君以

和粹謹飭被眷遇得美名于搢紳間藉甚性嗜清玩蓄之

頗富嘗名其齋曰米家舫少傳東里楊士奇易以今名而

記之陶頤雲富雜識

漢按謝君不知何許人雜識闕其名少傳集中必載及

此錄俟攷訂七更詞入藝文卷

太常卿任道遜十二歲舉奇童侍東宮書皇朝盛事

任道遜年十歲以善書貢入京明英宗令書龍鳳二字甚

工乃命對曰九重殿上書龍鳳對曰百尺樓頭望斗牛時

朝臣某足成一律云年比甘羅少二週山川毓秀出温州

九重殿上書龍鳳百尺樓頭望斗牛金馬玉堂身已貴青

燈黃卷業還修他時大展經綸手重沐恩波拜冕旒羣談採餘

任道遜七歲能賦詩作字經數尺有法有司以神童薦翁

家藏集

任道遜字克誠瑞安人詞翰皆佳善寫梅姜二酉無聲詩史

孫夫人永嘉人工寫梅寒梢粉瓣逗月凌霜皆從筆花漬

出但少香耳其夫任道遜仕至太僕卿直文華殿亦善寫

梅夫人之父某仕為郡守以寫梅著名人稱之孫梅花一

家能為暗香疎影傳神不減謝庭詠雪矣上全

黃蒙字養正永嘉人官禮部郎中及其子采相繼以書法

直內閣俱擅詩文養正寫山水得黃子久佳處筆致清潤

不減勝國名家無聲詩史

游性永嘉人明嘉靖衡山縣教諭衡山志

明劉元受永嘉人有四書孤嶼草明晉陽張師繹序 江西

府掾南昱穎敏好學何公文淵守温州免其治簿書召留

府署俾與恭毅同學正統間成進士仕至南大理寺何喬新章

恭毅行狀

生員孔一愚兩見章恭毅于淨社寺館中問之自言其姓

名不知為恭毅也聞之其師張泓及再來走報張其師出

禮之遍索一向不獲忠臣義士雖死其魂氣歸于天常有

久不散者類如此甌東秘訓

漢按高坡異纂載常熟楊浩然名集以上書救章綸鍾同因而敘功一級除安州知州足見扶持善類不失顯榮孰謂彼蒼無報施耶又按項參政喬甌東私錄章恭毅公世孫希韓進士朝鳳兄子也省試臨場聞祖喪奔去士論韙之漢以希韓聞喪罷試自是忠孝有本今之諱喪冒考者比比然也或因之倖獲一衿或因之釀案破產躁進忘親義理漸滅已甚無怪為世僂笑以視章希韓相去奚啻霄壤哉

谷良號確庵宣德正統歲荒捨粟賑濟又捨米千石倡勸

大雲寺築唐嶺竹浦嶺路三十餘里遵例出金百兩助軍

御史陳公瓊為題名董儲館石阮存谷確菴處士墓志

谷俊字仕毅捐谷六百石授七品散官谷寬字樸菴弘治

間捐金六十兩授散官甲寅歲荒散粟五百石賑濟成化時

築寶昌嶺路千丈有奇並捐勸定惠寺清寧道院太平侯

賀等嶺並見金數谷俊谷寬墓志

谷補號循菴正德間歲歉捐粟六百斛賑之又輸粟助濟

邊儲郡守楊公旦具達授義官永嘉谷氏宗譜

明四川按察使節庵黃公祠在郡城俛衙巷廳事有明成

化間大理卿廖莊所題世美堂字額門內又有合郡官同

題昂霄字額而內龕奉有明湖北監察御史東園公泰州
州判松臺公北京留守經歷華東公布政司理問雙峰公
鄉魁貢士孝廉節義崇祀鄉賢芝山公處士素菴公暨節
菴公共七粟主皆填號別而不書名考之府志自明一代
僅有黃元琰奉州判黃元璣理問黃祿成化丁酉鄉薦廣
州學正入祀鄉賢餘俱無考竊以奉州恐泰字之訛其即
松臺耶理問其即雙峯耶學正其即芝山耶惟東園節菴
俱屬顯宦郡志并其官而無之何掛漏乃爾俟訪取譜牒
再當考訂姑先識之黃漢識

章綸母金節婦詩誰云妾無夫一篇高季迪詩今削之列朝

詩集寄園
寄所寄

瑞安林正仲林懿仲俱進士項喬吉府地功郎林竹崖壙志

漢按郡志林正仲永樂舉人而進士無載懿仲則舉人

進士俱無載

朱腆字公撫號少川幼從長兄六安州學正勝與葉瑞峰
太史式鳳山陳主政定之相與讀書于永嘉邑庠雞鳴書
院中正德己卯鄉試以母老就選鳳陽縣尹誓志清勤鞠
躬盡瘁當道旌獎沒後棺木無所辦太守邵公元吉捐俸
為備之士民奉靈入名宦祠屯田御史楊公逢春從民之

請項喬朱少
川墓誌

漢按項集載腴曾祖良暹由進士巡按山東考郡志官爵無載

永嘉山有虎一日逐人其人登大樹而虎守于下適張文忠母自外家歸因雨憩坐樹下石上復取履在石擦泥樹上人膽落俄雨止母去人羣至虎逸其人始下追問張母何由坐虎脊張曰巨石也何有虎因往察之巨石無矣咸相歎異已而生文忠

異識資詰

永嘉典嘉靖己丑試會元唐荆川順之狀元羅念菴洪先且同道同心事座主不阿附亦不抗忤最爲得體

湧幢小品

葉魁字文獻山東濰縣司訓

永嘉悌華葉氏宗譜

王承慶崑山人萬曆乙酉舉人授瑞安縣知縣恤商惠靈

薄斂緩徵捕殺梟徒楊敬邑人憚之卒于官

崑山縣志

劉濬字一齋鄒縣令永嘉葉聰岳也

悌華葉譜

葉程字成大聰子由貢生授閩藩都事

悌華葉譜

明武宗朝命宦者出鎮各省刺史以下皆伏謁得便宜劾奏府縣非法事氣燄縱橫可畏世廟即位年纔十六時永嘉駱相君臣契洽每上殿即命坐一宦者過殿下永嘉故改容起立世廟注視良久明日竟罷鎮曰張先生猶畏此

輩況其他乎

堅瓠集

世廟病喉累日不語諸醫奏藥不效永嘉張羅峯憂思不

寢有里人解糧至京與奴有識因宿相府獻藥名長生草
又名金鎖匙生牆垣上結紅果治喉病神效集異編並見堅瓠集

羅峯翁雖入相得君其家人常穿兩截衣服家有子姪放
債踏算佔田害人嘗親撻而面詈之或令縣官加號以警

怙勢作威者此皆保全族人之道也項喬甌東秘訓

葉溥字思周永嘉人喜讀書詩習舉業為莊郡博門人正

統甲子為鄉試麟經之魁同年周文莊公雅重之後任大

治邑令政治寬簡清撻如布衣時及疾乞歸行李蕭然士

民思之請列于名宦子喜雨繼為修仁令亦尚名節擢守

永安州人以為溥家教云萬姓統譜

何文淵守温州有兄弟惑于婦言爭財講訟者何判之題

云祇緣花底鶯聲巧竟使天邊雁影疎兄弟泣謝皇明世說

予鄉尚書高南屏先生歷官二十七任所至有聲及歸治

家與常人無異也鄉里慕其名者入其家見一老兒方掃

地晒穀問曰高都堂安在曰我便是也其人驚而拱立謂

官人在衣架上此翁亦識此然謂得體則未矣項喬甌東秘訓

嘉靖倭寇初因市舶忿爭失于調劑又奸豪挾詐攫貨不

酬使倭酋蓄恨甘心一逞于走汪五峯徐碧溪毛海峰之

徒因而勾之大肆焚劫始于浙東既而瀕海郡縣所至殘

破類編

嘉靖二十九年福建林汝美等誘日本倭奴橫行水上時

廣賊陳四盼亦屢劫擾華夷成黨為患孔棘寇温州破黃

巖陷鄆衢東南大震

上全

嘉靖三十六年温州倭亂

沈明臣戚少保平倭紀略

漢按郡志三十六年倭寇無載至王僉事德被難志稱

在金器考平倭紀略則云在溫嶠梅嶺

常玉巖嘗備兵溫處唐華濱以大叅治兵甌括高行之將

軍參戎甌括倭亂東吳袁定山以部使飭兵甌括洋山凌

公吳人秉憲駐甌俱見何无咎集袁定山是否即袁祖庚

凌洋山是否即凌雲翼俟查攷又劉際明以侍御史守東

東甌 陳紹庭
繼志記

邱雨川名一龍世為沙園所百戶工詩歌洋山凌公駐甌

一日出租他監司於江心寺四山積雪凌公命題限江字

雨川即矢口成篇有一天雪意雲連海兩岸梅花春渡江

之句凌公擊節賞其奇警雨川志節詳見 何无咎 古集 堂武弁

能詩蓋亦鮮見 上全

天台徐一夔憇景德寺與永嘉曹睿分韻賦詩

二台詩話

王謙光温州府諸生貧不能自活客于通洋經紀之家積

貲同往日本颶風驟作觸焦石舟沉遇朝鮮徼外巡船載

以往聞之國王召見王曰道不行乘桴浮于海耶因以浮

海為題命謙光賦之謙光援筆而就曰久困經生業乘槎
學使星不因風浪險那得到王庭王善之館待如禮忽一
日夢至其家見僧數眾設資冥道場其妻哭甚哀有子哀
經而臨亦哭既寤思數年不歸家人疑死設薦回但我無
子哀經者何人夢境莫解但酸鼻而已又年餘王治舟資
送歸抵家几筵儼然髻與衰旁設夫婦相持悲喜交集詢
其妻作佛事招魂正夢回之夕又問哀經者何人姪某入
繼也因言夢回夕亦曾見之更為慘然徐秀方見聞錄
劉基嘗為上陳甌事蓋甌閩之間有隙地曰澹洋其南抵
閩界曰三魁為醜盜藪方氏所由亂基奏于其地立巡檢

司控扼之其姪民弗便也相率挾逃戍之卒以叛而大豪
復陰持其寔基使子璉上書奏之胡惟庸以不先中書卿
之使刑部尚書吳雲劾之以澹洋踞山海有王氣欲圖葬
地勿與則建立司之策以害其人致激變明史紀事本末
温州有杜拾遺廟後誤為杜十姨塑婦人像里人以五髭
鬚相公移以配之五髭鬚云即伍子胥也堅瓠續集並見高文虎蓼花洲

開錄

王憲工藝翰拜中書舍人與會稽陳鶴友善温處兵備一

玄副使祖羹贈以第額陳鶴所書也

姚高植雅扶氏記

明薛均平甫河東人任温州知事

永嘉梯雲薛氏譜

温州衛指揮使徐文娶永嘉谷泰女永嘉谷氏宗譜

湖廣醴陵丞永嘉薛駱住倉後娶谷定女上

林聰妻陳氏年二十二喪夫撫子琦成立從事縣庭三老

考給由授冠帶省祭嗣亦卒陳與媳張氏共育諸孫長孫

德芳入庠初與鄭氏約為婚姻嫌其貧悔之適清戎御史

王公湛塘按溫遷之為言之即委縣尹李貞庵歸其婦陳

氏嗣卒八十餘同府南江陳公書旌節二字表其門項高

志

滕宗沛治經嘉靖庚子登賢書與王文定公友善授眉州

知州未任而卒霞漢滕公宗譜

環壁書院侯二谷建二谷工詩歷官至江西布政使告歸

屏居浮沚建書院以環壁名焉王奔州文集

太玉樓在溫郡華蓋山麓王昭文讀書處李維楨文集

漢按太玉樓在今瓦市廟巷道光甲午燬于火

袁遷字宗喬號芳洲永嘉人世居黃嶼以醫學應薦數試

禮部特旨授御醫其回疾起瘍十不失一項喬袁芳洲傳

芳洲永嘉宗喬居焉種橘數十本於洲上游而樂焉因以

為號唐荆川文集

許忠簡公後裔名繼善輸以助軍餉嘉靖十年授職散郎

奉旨立尚義石以旌之義石亭碑記

漢按尚義石在今飛鵬巷又康氏累世尚義石在百尚巷

陶望齡遊台岩路程記云舟至館頭易舟涉甌江早晴江行雲物甚佳長刻至江中孤嶼止僧蓮泉房循覽江心寺又卓二祠登東西二浮圖晡時黃四山人蔡孝廉來訪戊申偕黃山人步入州觀王賜谷園宅松竹甚美出南門買舟遊賜湖觀王氏別墅飯墅旁小巷散步數里訪三憲還江心移索入舟宿明日乘潮行七十里且至青田又明日經石洞觀上瀑布

說郭續

溫之浙東道向傳有怪而不可居副使曹自山忤正人也

移居之怪輒遁去忽入鄰近人家放火淫人其人乞真人之符設醮驅之是夜雷電火光閃爍其房圍內外真若有追尋驅逐其狀者次日怪遂滅

甌東秘訓

温州通判黃公忽夢四西瓜一開花次早出衙見三僧在市遂傳至衙詰問一老僧稱名雲外他名雲表雲際隨處行遊現住東門侯思止店又問以汝有四僧何止三耶命呼侯思止至稱尚有一雲中和尚在樓即拘至詢係婦人名四美父名賁廣東南海人隨父赴紹興府為知事至一地方遇此三僧殺死父母及家人留妻裝為僧今已半年實忍辱苟生冀得見官府申雪此寃獄定遞四美還南海

賁家收養置僧于法焉

種書堂校
刻集異編

鄭氏谷琛妻早寡孤尚垂髫有貪暴屢欲殞其孤危甚鄭百計捍衛乃得脫孀節克完孤存祀賴誠婦德所難也又林氏谷旦妻早寡孀節凜然操家教子皆有法享年八十有四

劉弘耿字介夫號人峰由選貢官直隸太平訓導轉萊陽教諭萊俗溺愛者女老而不嫁貧者雖育男亦棄不養小夫條陳代巡正俗因薦升魯府教授太平給事中周怡贈以詩有官間責易稱道在居無慙魯王桂齋有送劉傅歸

養序

泰順劉
氏宗譜

劉弘樂由齊掾考充兵部選司通吏

上全

漢按通吏名目於此僅見

節婦毛氏泰順劉隆許妻夫亡撫子暨遺腹子成立堅志相舟三十年不事膏沐嘉靖庚申以疾終

上全

陳伯俸嘉靖時河南周府教授張邦太醫院御醫俱永嘉人侯一麟蒲岐人江西萬年縣丞

永嘉方川
何氏宗譜

何鱣妻吳氏二十七而寡撫二孤困于伯氏冀其奪志佔業長兒死于毒次兒娶室踰年又亡又被族之不肖者盜賣其田至抱遺腹孫瑛成人氏宏治壬戌生以隆慶庚午卒年六十九

上全

何起妻葉氏二十三而寡誓志以撫三孤成立次子文美
入郡庠氏生永樂戊子卒成化甲辰年七十七而終上全
何允女歸于陳踰年夫亡家益落舅姑冀其易嚮乃歸依
兄二十一而寡七十三而歿蓋兄文資居室衣食之有以
成其志兄妹節義可並高矣上全

周若水温州人深明星學著太陰論一篇行於世陸位張果星宗

漢按陸斗南星宗括蒼人杜全成化間游永嘉推命多

奇驗好事者錄其批詞彙句成集蓋早遇神人授以

星術云

温州銀壙人發廷議選貴州道御史葉恕臨之規畫有條

尤冰蘂著饒州府志葉一樂平人

温州王憲副族女初許字張已笄猶短小若五六歲亦寢

陋張請婚期其父母難之以情告竟別婚有何氏子慕王

之閥閱旋請吉委禽之期年女頡長大美好過于常女後

生子登進士官四品五封太恭人中州季崔林名振青校刊乾隆六十年刊明

人集異新抄按新抄八卷悉載明朝事

平陽縣解中多鬼怪鄭櫟年作縣令素不畏鬼嘗月夜酌

亭下忽有婢出梧桐下甚肥暫立鄭傍鄭遽使撲扇復來

一婢稍黑鄭使執壺二婢相視而頰偃蹇鄭輒罵杯擲

其面撲扇數十迴見鄭哈臺于榻上擲扇走出曰誰耐此

醉漢其一婢竊飲亦醉卧鄭聳蕭偁讀書解側聞人語聲
窺視既久密呼家人共前執之婢醒走入樹下乃掘地二
三尺空穴中有二大蝙蝠一白一黑大于蒲扇家人欲擊
殺鄭笑曰彼待我飲何害當縱之去遂撲撒牆外自是鬼
絕全上

桑乘補卷之六

東嘉黃漢鶴樓纂輯

平陽王宗權南京豹韜衛經歷有終慕詩卷求項遷之識
哀張羅峯有詩蔡光祿葉太史有序甌東私錄

秀才王勳真志實行毅然以孔顏自期使得俎豆之何患
吾温小鄒魯之風不可復見于今原呈具厥弟生員王煦
行狀盖因無爵位功業可言故借此聊印證焉耳項喬與雷古和

提學書

漢按項参政書又曰太率道義之心人皆有之然須上
有好義之人能標榜而激發之庶中才之士不半途

而廢者其所闕非一人一家之故也。惟公氣節負天下之望，其試士至公至明，實今世所罕見者。此舉非公誰與成其美耶？又書曰：王勳秀才已有旌榜批申，因傳盛意，但勳雖無功業，可見惟其一念希聖真志，百年向道，精靈幽當契于孔孟，明當合于我公。書曰：稱匪其人，惟爾弗任。喬曰：固不任匪人之咎。漢竊以爲政之道，不外勸懲。郡邑中不乏高行儒士，與夫義夫節婦、賢大夫，苟能留心廉察，多方激勸，則觀感而興起者必多矣。風俗轉移，人心反古，其利益于國家，豈淺鮮哉！

龍船既稱競渡，卽是爭端。喬聞往時有因此打死人命、亡身敗家者，近聞子孫共謀爲此，而族長正司禮亦坐視不禁。借使有及於禍，能保其不覆宗乎？今後尊幼有故違并不禁者，敬請明神殛之。項氏家訓

漢按溫屬各縣近數十年來，因鬪撻龍舟，致釀人命者不可勝數。兇徒償命，殷富喪家，凶累可畏，殊甚讀項公家訓可見先後一轍。安得賢有司暨鄉先生嚴行糾約之，使村各自禁戶，各自戒改惡害之習，返瀉古之風，顧不美哉！

南塘有人未嘗爲不善，因嫁女不足，盜布二疋，布主獲送

縣時多盜縣尹榜縛于梯以徇眾其妻子恥之竟不肯顧
水漿不得入口凡五日而死棄屍西山世之不義求利者
凡以為其妻子也死且不自顧其妻子何嘗顧其死耶此
可以為無恒心者之戒上全

項遷之參政曰今人奔尺寸之祿走絲毫之利熙熙而來
攘攘而往如羣蟻之附腥羶聚蛾之投燭火取不為醜貪
不避死飲羽于市門之下血及於風波之上悲哉上全

羅念菴謂吉水自吾師王子揚作縣後其興利除害至今
無能及縣堂上有二聯云野花啼鳥水霜外白日青天筆
硯前節用而愛人正己以格物今尚在即此已是好上全

永嘉僧野雪以奕稱一日在許無念宅與吳嗣仙對枰仙
稱第一手沉思而後下一子野雪殊不顧對客閑談隨手
應敵無不取勝來子魚贈以詩云蕉團坐隱靜皈依十九
行中喻法微慧眼欲生拋厯劫觀不定却斜飛分先許
爭先手戒殺何堪露殺機跳出刀山投鐵網與師一笑解

重圍

褚稼軒
堅瓠集

郡城忠烈儷美祠為明太僕吳寶秀暨妻陳氏建

在府城
隍廟西

蘇茂相謁祠詩識君燕市日棘寺正持平為郡熊車
去憂民虎尾櫻臣心匡嶽峙婦志蠡湖明祠廟如賓
處階前芷蒨生何无咎有哀江頭一篇弔吳太僕

暨陳淑人也見汲古堂集

周朴菴名思賢里有軍籍周志善兄弟爭軍欲投河死以相規避朴菴見而止之曰軍猶人也吾代爾當之汝兄弟可無死此洪武二十五年事踰二年改調寧波衛令三子輪戍之是固人世間所必無之事而慨然爲之可不謂難乎天佑公後一傳而有畏庵旋以文章魁天下再傳而有粟源服草窗接武登科三傳而有際五應期玉墀先後榮膺華撫皆朴菴公爲善一念有以栽培之也永嘉周氏宗譜周草窗琪字汝美知福寧州在任四載不樂拘職棄官家食個儻豪邁詩文務得大體平實好客客至命酌雅歌投

壺晚慕香山洛社結八老會皆一時賢大夫逍遙物外也

上全

瞿溪蔣正之有才能以掾吏爲太府陸鎮卿薦進陸公得以坐嘯蔣事之益謹弟能之號西澗有名德致仕后二

尹鄭雲麓福寧太守周草窗皆與交遊

項喬蔣西澗壽序

漢按雲麓名理永嘉人郡志入孝友傳草窗卽周琪也

王洪字悠深隱身醫流建長春亭前尹石厓周公取其能起死回生廉其能悅親利物遂給券昨之山麓嚮之用勵

溫民之未知義者

項喬王悠深傳

溫郡丞胡諧字東渠在任修稽古禮文之典凡坊門圯廢

不問存歿悉為一新項喬文集

漢按胡同守郡志已入名宦有傳而此節未之敘及特

為錄出以見賢大夫留心政教有以感發人心焉耳

周一奎由惠州別駕擢真安州知州永嘉周氏宗譜

漢按郡志作安州知州恐訛又按曾侍御舜漁周元六

征黎凱旋序初攝篆興寧聞奉調征黎百姓若失怙

恃跟踣走兩臺乞留兩臺慰勞之曰此軍旅宜爾

等能為一方私此官乎因不允所請又按瓊州別駕

青田潘天熙廣州推官於越潘融春俱有贈周元六

征黎詩

易應昌號白樓臨川人以御史大夫論獄忤旨謫戍温州

在温惟心儀封公周麟野時相遇從言論甚暱何白書易白樓周麟

野誄詞冊後

李綜纂朝鮮金太妃為之請封建論久不決公曰去便

今度更兵力孰與往時而言討耶南康守吳寶秀為陳道

誣害至是請恤無敢援者公為申請得贈廕閔氛方熾大

師策用紅毛番又用呂宋公引拒虎進狼語折之乃已九

江旱詢之父老往例計戶斂錢供上司行李號排門錢民

不堪命公除之天遂雨禮部給事中山陰姜希轍明都憲周應期墓誌銘

諸葛旦永嘉杜舉人以太學授蘭州吏目娶周草窻女周必

龍游靈山寺街口及吾溫西郭大街頭俱有廢廟神像在地有有首無身者有身無首者有橫卧于街肢體難辨者其地人烟輳集卒無一人敢去之蓋江南習俗酷信神鬼猶虞其禍福人也夫天地除應祀神祇外餘俱土木偶而已何能禍福人之有愚夫之難曉也久矣前此文徵明乃翁先生林守溫凡淫祠折毀殆盡魏莊渠校督學年也亦然此省見道明而自信篤善于風化天下者也誰謂今無狄梁公耶

項喬
東私錄

周益姑熟人景泰時任溫州府教授有何朴菴墓誌

永嘉
方川

何氏
宗譜

萬曆辛亥溫州磐石衛獲夷船二隻凡一百二十人稱是安南國首環目黑齒被髮衣袷無幅言語支離不通而文字不異中國相見以搓手為敬吹箬葉作聲有清烈為舟膠以木葉舟軟如紙可掬其序立有似尊卑魁然而紅毘盧者酋長也初見人惟痛哭既而引見上官庭下偶答他囚相與惶駭股栗官發置各僧寺十人為偶以兵守之未免飢困水土不服數日有死者酋長為詩云微軀漂洎豈無家只為蠅頭一念差昔日已曾朝北闕今朝焉得指南車夢魂自信歸鄉國骸骨誰憐沒草沙寄語妻兒休

問卜年年滴淚向中華上官見詩稍憐之為給廩餼後因
朝廷遣使封王奏奉飭送歸國桐下

沈僉事瓚字定菴萬厯丙戌進士靜輝堂集有雁山諸景

詩吳江沈氏詩錄

東嘉蒲川管希召積善好讀書工詩文所居古樸閑雅無

雕飾之巧因自號曰拙菴葉原敬嘗過訪焉包瑜文集拙記何鯨

字雲峰楚府引禮永嘉方川何氏宗譜

蒼山船首尾皆濶帆櫓兼用風順則揚帆息則蕩櫓用之

冲敵頗便而捷温州人呼為蒼山鐵見王鳴鶴登壇必究

朱鋒振濱雜記抄

曾鳳翔號松華萬厯邑庠生與弟鳳翔同以文名時有二

曾之目著作甚富有稽古彙編永言集遊覽間集詩經總

歌醫方茶要夢花箋傳奇以壽終永嘉曾氏譜

曾鳳翔字篤倫博學能文下筆千言董太玉翁異其才妻

以女兄弟友愛老而彌篤郡守王公國泰因其壽獎以祝

詞歿年七十有六著有間吟集上全

按董太玉翁不審何許人或云崇正朝特賜進士董

卿是否俟攷王國泰康熙時任温知府

城南法嚴寺塔下二塔有傳識云皇明崇正壬申廷堅上

人以青年妙德新廟修塔得內記乃知為宋元祐壬申賜

紫陽沙門玉勾所建奉供舍利塔也每塔各二十五顆其一為土人所得舍利色如明珠間或有紫者隨以四十九顆分供雙塔夫自宋至明前後壬申而一重建將非其再來乎始建堅祖以形家言將湮塔有二赤龍自塔出而止後之脩者慎諸郡庠生姜受權記鄭蕙生氏嘉德鈔

明季滕文岳妻徐氏生子雲鯨三歲喪夫苦節五十一年

甘貧勤紡績撫雲鯨成立入邑庠時山海之寇歲無寧日

雲鯨遂棄業事生產事母至孝揀行純篤鄉黨宗族皆稱

孝弟焉霞漢滕氏宗譜

何懋官字希賢號方巖初治崇明邑有沙地易致饒富者

向為豪右所佔公不畏強禦取其地而悉平之故當時稱

治績最美者推平沙一事歸省時有鄉民苦長埭太高禾

稻屢至沒公目擊怨咨奮然為地方造福請於府縣減

去埭石一尺使水勢易通而田資其利至今故老猶祝

焉永嘉方川何氏譜本傳

林龍湖永嘉人官雲南定遠縣見何氏譜何斗南與何懋官書

漢按斗南名光龍字錫文定遠縣籍萬曆甲午選貢本

永嘉人見選貢齒錄

吳明隆永嘉人任廣東潮州鹽大使永嘉方川何氏宗譜

謝茂恕瑞安澄江人萬曆時任雲南曲靖府經歷全上

何昉號雁山萬歷時由吏員任儋州昌化所吏目上全

謝正魁南京大使瑞安二十五都人上全

王佐永嘉人萬歷年貢生上全

何廷相瑞安人任長沙吉王府典膳上全

高元肇北直元氏丞上全

明建文時戶部侍郎忠貞公諱敬靖難不屈死與方正學

俱夷族其子孫有脫者流寓仁和從外家之姓曰宋氏萬

歷中鴻臚寺鳴贊諱文炎忠貞七世孫也始以仕顯復其

姓人迺知忠貞有後矣吳偉業卓海幢墓表

漢按杭之卓氏在仁和塘棲鎮有卓棹號入齋發之字

左車人月號珂月三世學行聞海內珂月子天寅號

火傳兩舉于南北闈皆中副卷見盧祚明卓氏傳經

堂記又國朝兩浙詩鈔卓發之號蓮旬仁和籍瑞

安人忠貞六世孫淹博羣書兼精內典構傳經堂延

四方賢豪子人月孫天寅皆士林之望詩饒風韻以

副車終有濟堂集卓汝立字心齋亦忠貞孫由貢

生官藍田令時大飢請賑救荒民賴全活後隱居江

都又按郡志本傳李維越崇正辛巳召對擢給事

中上疏請卓忠貞于忠肅贈卹又按項參政喬文

集嘉靖二十四年洪覺山太守欲改公祠于張氏官

房立碑求記予慨然亟爲之未幾洪因事被論去而
碑石至今未立予亦竟失原稿因書此以俟將來有

志勵世風者

劉球江西安福人官翰林侍講

以忤王振矯旨下獄死諡忠敏有兩溪集明詩綜

卓敬寶香山騎虎之事

浴溪雜記亦載

武當山瓊臺觀側有憨憨道人何白嘗見而問道

汲古堂集

滕希周號隱菴邑庠生工詩文字畫與何无咎邵少文吳

衷葵相剛和由城遷洙浦與何无咎爲鄰詩酒之交老而

彌篤

霞羨滕氏宗譜

張時字汝海永邑舉人官四川內江縣尹

永嘉曾氏譜

漢按郡志張時官爵無載

望江樓甌劉郡伯建據一郡之勝柯茂倩集詩云南國棠

陰幾樹汶里人猶說舊諸侯風流何處留遺跡一帶清江

數倚樓

柯榮歌宜室集

按劉郡伯爲誰集中不載其名維時温太守有劉芳
譽或即其人與否俟考

謝池康樂舊遊處臺榭無復存者張比部爲構水亭疏流

累石遍植花木有小臺前對華蓋山城內外綠墅清流盡

入目中柯茂倩有遊榭池亭臺寄張比部詩序上全

按張比部爲誰集中亦不載其名柯茂倩詩人也與

何无咎為友詩以紀勝正所以傳勝今粗漏乃爾令後之人奚所稽考流覽之餘不無餘憾焉

郝仲輿林止嚴俱曾宰永嘉何无咎集並有贈詩今考邑

志隆萬間均無其名

陳紹庭繼志記

周杰字性夫天啟時任河南永寧知縣嗣入覲卒于京

吳源

起永嘉周氏宗譜

柯茂倩河中有泉說郡甜井巷河中初有井水甜美嗣汚

于穢塞之由是巷之口橋畔水忽甜焉然則甘泉易地誠

為就潔避汚顧不聖歟

鄭荻疇氏娘述

徐柏齡字節之嘉興人崇正庚午孝廉署永嘉儒學教諭

後南都破遂自間道入閩尋匿羅陽之天闕山亂定歸里

逃禪以自晦

長庚畫徵錄

漢按全浙詩話作崇正庚子舉人永嘉訓導能詩著有

勗光樓集考明史崇正無庚子從庚午為正也

明季故事戶有總甲役密邇邑治者尤重罪自城旦至編

戍枯拳未即遣者屬總甲為守晚則納園扉居民苦之而

分在編戶無以自脫撫院檄育三女者得免雜役

柯榮歌宜室集

感事記

鄭荻疇先生娘儒生而有心世道者嘗曰讀斯記當

時温必有溺女俗撫院以育免役之檄似為得矣然

有限于命數生女不得其三豈非仍難免役且在上者止憑文報在下者多事賄遷於是飾無為有報少為多滋弊顧不重乎我朝罪囚無重輕悉官為監禁概不役之民間是政令之正大誠邁越前代有不可及焉

甲中鼎革南方臣民死者瑞安諸生鄒欽堯永嘉諸生鄒之琦皆投水死

歷朝通鑑輯畧

漢按邵邑志有鄒欽堯名而鄒之琦失載

温州府教授鄒用賢訓導陸啟明孫謀樞弘光元年八月有祭四州真安州知州周元六名一奎崇祀鄉賢文

永嘉周氏宗譜

漢按鄆用賢郡志作麗用賢而訓導陸孫人俱無載

南都既陷閩中震動有李將軍唐熙來溫駐劄越月拜監

國魯王之命移鎮台州

邵建章序聞續錄

漢按王湮輞川詩話乙酉閩師李唐禧華亭人知鄭氏有異志遂奉詔入越下東甌越聞公名拜鎮南將軍鎮天台丙戌城陷死之

乙酉七月魯王至舟山黃斌卿拒不納因次普陀督圖熊汝霖等掛印總兵陳文達等從焉文達字匡侯温州汪光復航海遺聞後溫鎮總兵賀君堯航海朝王黃斌卿令朱玖劫殺之前

邵建章序聞續錄

丁亥夏魯王在溫澥中之玉果山後入福三州平陽侯周
崔之字九元太子少師掛印陳文達等各聚兵攻三山近
州數縣皆下之清兵旋克復之 己丑秋王朝先取糧台州
監國魯王五年上在舟山九月周瑞周崔芝樓船三百餘
艘分屯溫之三盤以爲舟山犄角亡何瑞芝有隙上使武
陵人胡明中往解之明中至三盤構之益甚瑞遂南依鄭
彩芝亦北依阮進 黃宗義行朝錄 按二年丁亥上在閩
之長垣各鎮俱以兵來會進月瑞閩安伯周往之平彝伯
崔芝先爲黃斌卿副將

丁亥六月黃斌卿殺忠威伯賀君堯劫其貨君堯帥溫州

嘗賊殺禮部尚書顧錫疇爲衆論所不與溫敗入閩復至

溫之玉環山收其漁稅挾重貨入舟山其標將歐興有隙

于君堯潛告斌卿斌卿遣盜殺之中途

舟山興廢

日本乞師大臣論曰宋之亡也張世傑嘗遣使海外某國

借兵陳宜中亦身入占城借兵崖山既陷兩國之師同日

至遂不戰而還今日之事何與之相類耶据此則宋之陳

宜中占城乞師之舉非誕或謂逃入占城則忌者之誑辭

耶 崔之日本乞師未遂其計

十三年朱成功略溫台等郡嗣江南之戰旣敗回島復至
吳淞江擊崇明不下以陳輝等守舟山劉猷與官軍戰于

温州敗績死之

張獻忠被左兵追至穀城以珠玉賄熊文燦遂偽降左良

玉既襄陽巡按林銘球巡道王瑞梅欲誘獻忠來見執之

文燦以殺降不祥縱之已而獻忠復叛三朝野記

陳志學字俊卿崑山縣人至正間由於潛稅使挾粟萬石

濟國饒授宣武將軍温州路總管以疾終于任

黃玘字廷儀崑山人由良賢徵官至温州知府捕盜有功

願志參張大復傳

王志堅字淑士崑山人萬歷進士天時督浙江驛傳居

官執法其在浙也議鹽法者歎行温州粟鹽以佐餉議水

利者欲盡隳諸壩客艘直達會城皆名美而實不使力陳

其不可而止葉均禧王志堅傳

以在四條俱見崑山志

林增志字在先與李小有書

蓮大師此刻如餌小兒不令過飽如相瞽者不使疾趨其

向上一着隱躍舌端終不說破固已金針暗度矣周亮工尺牘新

鈔

桑乘補卷之七

東嘉黃漢鶴樓纂輯

趙重熙平原選貢由陝西莊浪同知陞温州知府禁濫征

蠲瀉鹵平徭役息奸訟

平原縣志

任有鑑初判鳳陽以守禦聞

國初陞溫州守未蒞任卒

蒯過庭遊永嘉小若巖序云予遊至其處小若巖洞主人

出而肅客則予友閑菴教公十載判袂同於隔世突如見

之若在夢中執手道故相與瀏亮

鄭信湖州詩錄

漢按詩錄小序蒯過庭歸安人明季諸生其遊小若巖

詩序一篇灑灑千餘言文極奇宕得此誠爲小若巖
生色文房錄藝文卷中。又按兩浙輶軒錄超齋字
眉光號閒菴永嘉僧著有小若巖集十卷

縣志列女傳第十一頁孫秀環妻王氏等二十一名姓氏

重見又二十七頁虞一足妻吳氏等三十名姓氏亦重見

且金孝子妻陳氏訛爲金孝婦妻陳氏

黃漢識

崑山顧瑞屏諱錫疇字九疇崇正朝官大宗伯甲申國變
後闔門悲慘誓以死殉父筍洲翁自餓死瑞翁後在温州
丙戌六月十六日爲同事賀君堯所害沈之江華亭令張
調鼎字太羹公門生也好請乩仙公忽憑降書其致害之

由張公立遣人至温州蹤跡之一一不爽後君堯入海亦
爲人所殺見僧戒顯現果隨錄。戒顯按余己丑秋在吳
中開元寺硯友吳純祐來晤余以其曾爲永嘉令談及瑞
翁事純祐曰此弟所身經而目擊者丙戌六月十六日弟
讌瑞老于江心寺明晨報瑞翁被害弟召募漁人捕之無
影響當夜夢瑞翁立水中指向其灣尋之早起果尋獲焉
乃力助扶櫬歸崑純祐諱國杰庚辰進士公歿三年司理
席君教事亦遇公降乩問賀因果以爲夙怨使然蓋三事

一轍也溫友蔡君符親傳

屠琴陽潛國集錄

漢按國朝詩別裁王撰哭外舅鹿城顧大宗伯

自注丙戌

死難温州江心寺 閩嶺衣冠擁殿墀偏安猶見漢威儀驅車

海嶠看傳檄拜表江關始出師萬里弓刀空報主一

船棺槨僅從兒靈旗夜雨歸何處指點文山異代祠

自注寺有文丞相祠 丙戌之前隆武正位閩中讀異

公此詩宗伯似赴道溫惟君堯何爲害之江中惜不

叙明又按通鑑輯畧丙戌六月朔大清兵渡江至

紹興魯王遁於海維時台溫相就檄定宗伯其或以

勤王商之君堯至于被難詩中弓刀報主一語義已

可見惟郡志載顧公墓在江心寺又陳聖治記顧公

留甌因悍帥賀害民公據法劾治帥排墻殺之沉于

江生有益甌民歿歸骨甌土宜附祀文文山廟庭云

云据吳純祐力助扶櫬歸崑之說及王詩一船棺槨

僅從兒句則是郡志及陳記所載江心之墓均未爲

確時亂未定恐傳聞互悞耳至附祀之義洵爲正舉

及今能否行之無懈然崇節勸忠誠有司之責也

又按崑新合志馬士英當國顧錫疇雅與不合給事

中張正震等劾之遂乞祭南海去明年致仕南都失

守鄉邑亦破時方遭父喪聞關赴閩唐王命以故官

力辭不拜寓居温州江心寺總兵賀居堯撻辱諸生

錫疇將論劾君堯夜使人殺之投尸于江溫人覓之

三日尸僵立水中乃得棺殮立碑文信國祠祀云見明史參東林列傳

又按崑山志顧錫疇墓在吳縣十九都陸家塢據此則顧櫬確已歸葬無疑義矣其江心之墓或當日士民得公尸浮厝亦未可知附考

佟軍門撫閩謂受顧司成老師深恩以有今日今顧師死難東甌已為迎春至省長公現在此顧閣部

之長君墨哀赴嶺南東道

云云

顧宗伯錫疇乙酉奉使東甌死于口其尊人筍洲公十矣在家口兵至吳門即不食臨終書數語而絕宗

伯長子獨降為官一日見祖父來大怒責其墮節義忘忠孝立擊之死人皆聞錢絳聲銀然也忠爽耿耿不淫如此

甲行日注

僧木拂

謹按文信國既赴義是日大風揚沙天地晝晦宮中皆秉燭羣臣入朝皆列炬前導世祖悔之贈公太保中書平章事廬陵郡公隨設壇致祭丞相孛羅行初奠禮忽狂飈捲地吹沙滾石不啟目俄捲神主於空中隱隱雷鳴如聞怒聲天色愈暗乃奏改前宋少保右丞相信國公天復開霽焉見鄭龍如偶記是公之神靈赫著震懾元主繇于正氣格天昔公謁二王遇

溫曾寓賢跡至今江心祠祀甌民久屬麻庇謹附錄
斯篇俾廣其知庶更增所欽瞻又謹按台州杜少卿
許隨公求二王至溫今杜公已從祀廟庭而公客謝
翹與公同為周旋艱險其西臺慟哭尤徵最忠至德
矧謝公亦嘗到溫有江心寺詩是謝公一生志節昭
然有徵並宜從祀以彰忠蓋謝公詩見晞髮集另錄
藝文卷

又按癸辛雜志張世傑死其部曲張霸收其遺貨放
舟回永嘉途次為周文英所害周得世傑所愛二美
人盡知供軍金帛數凡數十船悉掩有之

月在蘆花學到絕忘還合轍人因出處始分途一回
相見呵呵呵笑我是寒山破落瓠

郭景曹杭人進士礪松妻詩思幽折有妹字兩洲適東甌
段氏景曹寄詩云姊妹經年別吳甌千里餘啼殘襟上血
望斷海邊魚對鏡思雲鬢因風寄素書書中無別意惟悵

久離居

湖墅
詩鈔

董振秀温州同知尋以僉事備兵於溫升參議分守處州

平原
縣志

潘之彪順治辛丑進士出州司理奉裁改知逢溪縣

丹陽
志

鍾老六名斌鄭芝龍餘黨竄入浙洋嘗以佯敗誘官軍

洋賊踪四合總哨皆沒甯紹台温等州相繼告警巡撫張
延登增船召兵以剿因而漸平

綏史未
刻編

順治六年山賊何兆龍屯聚柘溪陳杜之誘之攻樂清城
遂蔓延縣境諸處賊皆以白布裹頭呼為白頭寇凡五年

始滅

太平
縣志

漢按丁蘭石鍾英片識云何兆龍之先有陳世亨揭竿
倡亂勦捕未果兆龍輩相繼而叛見朱鴻瞻集又前
明山寇繼葉丁香作亂者陳德而後又有福建邵茂
七處州葉宗留葉無敵先後擾害羅陽諸縣尚書孫
元貞總戎李信等剿平之

又按徐銓鑿屏詩集秦小峴觀察得文丞相真像鐫

石江心祠壁並系以詩。顧公流寓吾温遍游諸山

水名勝今茶山五美園尚有顧公洞

荻疇氏
鄭娘記

道峰禪師順治壬辰仲春有東甌之役春杪歸自括蒼晤
余皋亭山居出示紀行詩若干首余疎懶卧疴久荒筆硯
觸事興懷不能已勉賦廿絕以志宏法嬰難代有其人焉

釋智蘊
巢拘集

漢按智公詩二十首細釋意義暨宏法嬰難語其道峰
似當國亂未平官禍株連東甌之役安知非對簿被
逮及歸自括蒼皋亭晤對則是脫離殃禍詠歎咨

也今摘錄數篇以備攷核急速官期豈等閒謝公省
外曉間闕龍湫歎籌芙蓉路不爲膏車者雁山那有
天書下翠微風流光寵紫羅衣故爲遠折官橋柳馳
傳來提格外機馬首谿山歷亂生三吳八閩望中平
那知荷法懸車日只麼區區魴尾頰無事於心險夷
叨叨物論不須齊一雙衰莫頭耳千里關山聽鼓鼙
爲衆身心已殫精那堪殃禍出私門骨堆平地無多
子籍籍高名北斗尊生還喜得語同風勁色端如雪
後松不獨魚龍知性命俾他江漢自朝宗更番遮覆
到官衙玉本無瑕任指加囉哩一聲山失峻夜深明

董光紘字樸生永嘉諸生明亡隱于山鄉一日垂釣溪上
忽有神號于空曰光紘當掌百萬生靈于是光紘頗自負
而垂釣不休四近得其魚或別艇上得者剖其腹皆有紙
光紘字遠近咸異之因而謠詠暴起有司緝捕甚力一日
官役緝至太平時光紘方與寺僧對奕役前致問光紘曰
適有人似光紘甫出寺役信之去而光紘談笑自若神色
不少變役既離寺光紘旋亦遁去後遂不知所終溪上魚
及今土人猶有呼樸生魚光紘博學工藝翰得其片紙莫
不珍爲拱璧朱氏振濱雜記抄

漢按故老相傳樸生每談釣則魚聚其下者必以千百

計其掌百萬生靈之說或卽是歟不悟至理便有
爲之害可不畏哉樸生隱于郭溪或云瞿溪

縣志第二圖大高橋小高橋訛爲大真小真又藝文趙鎮
重建大若岩記宜加一祠字蓋大若岩無可建也又瞿嶼
山因有楊府廟故稱楊府山今縣志圖作陽武山或別有
所本歟均宜修正

黃漢識

順治戊子以來山海之寇肆虐日甚十五年戊戌夏海寇
鄭璟困甌旌旗蔽江民不堪命賊退未幾大兵雲集雜處
民間室廬器具皆非已有民人負戴之苦供億之煩有不

堪回首者

榛有盛年譜

漢按鈕玉樵瓠騰鄭璟作鄭錦又按楊陸榮三藩紀事
本末順治十三年鄭成功進畧温台等郡十五年七
月攻陷樂清等縣

康熙初年因東南海寇之患盡徙江濱之民於內地墮廬
瀕田築為邊界使內外不通用以饑寇待降

朱鴻瞻竹園彙序

漢按滕有盛年譜順治庚子以海氛不靖議將一都至
五都瀕海人民徙入內地以茅竹嶺為界外則棄而
遺之

甲寅閩變温州總兵官祖宏勲通欵伏甲資福山大觀亭
集衆官議餉巡道陳公卅赤永嘉令馬公琬在座逆將厲

聲曰兵餉不前士盡飢餒抄陳道家足以給餉巡道夜不收即鷹捕手林義者挺身前曰爾欲抄我道主豈非反耶劉廷璣在國雜記遠扶公出逆將怒揮甲士寸磔之二公不屈皆遇害

漢按王漁洋輓永嘉縣知縣贈浙江布政使司參政諡忠勤馬公詩武功天一握家世右扶風豈意逢天醉翻令作鬼雄太常新議諡御筆昔褒忠萬古金鰲背靈旗下海東見鸞尾續集攷通志馬公係奉贈按察使非布政也鷹捕林義以賤役同死王事忠憤可嘉不有在園一記名幾湮沒無聞矣

又按閩志陳公丹赤閩縣人其裔派有遷居溫之平

陽蒲門由蒲門有轉遷郡城者陳必達其嫡裔也見陳氏抄譜必達端慤有信行以醫術隱于市

又按徐鑑屏銓詩注曾大父爲觀察陳公幕客陳公殉難華蓋山覆巢幾無完卵曹大父負公子歸置之復壁中時先人遺構尚在蛟翔巷之落霞潭也考周聲灼貝子富公恢復台溫事實馬知縣姪馬穎姿被害子逸姿尚幼家人抱出遇生員李謙受托之謙受轉托生員潘殿颺抱回撫養二人者忠臣有後固出天佑而冒險存孤則徐幕客暨李潘二君之高義亦迴乎難及也又國朝詩錄康熙甲寅閩變永嘉令

馬公瑛與溫處道陳公丹赤同時殉難後馬公子觀
察君陳情 行在得諡忠勤仁和沈麟洲元滄以
詩紀盛云一官迢遞到岩疆閩海烽烟正擾攘此日
陳豨終負漢同時南八自忠唐三年亂定聞家祭兩
字名尊慰國殤廟社靈旗應儼在清魂千古戀同鄉
又吏部主事太倉唐孫華弔馬忠勤詩青袍白馬塞
甌閩一命官卑大義均豈有兵符麾士卒要將全節
臣鄰 君王未識真御面戰陣甘捐先軫身尚念
天恩未酬荅生兒留作報恩人見東江集又鄭稼堂
之良弔陳觀察丹赤公詩三春烽火動甌閩千里邪

氛壓海濱自昔讀書期報國臨危首策重安民可憐
赤鐔含冤日不信盧龍有賣人繼軌常山留正氣獻
城愧殺叛盟臣

又按西河詩話康熙十四年四月十八日富陽沿江
地名陸山者居民夜見墜二星如雷入地三尺縣令
出視發掘得二石各重四斤有餘則儼然金也徐隱
君涵之曰落星爲金甲兵林林時適有甌閩之變蓋
落星不同有爲石爲金爲粟麥爲飛蟲耳 陳玉山
名璟永之崑嶼人素知醫康熙耿變玉山適有事樂
清兵阻不得歸迨富貝子統兵至樂將擬渡江玉山

以郡城寇集不可渡走轅門獻言貝子是之遂改由山路入柵溪因得夏聲爲鄉導時官兵多患疫癘玉山隨行醫治及王師抵溫與聲共事尋亦染疫歸事平夏聲以功敘用玉山雖獻言於先不得與斯典何遇合難易不同如此

康熙十三年甲寅夏耿兵至溫及城降郡富室無不索餉有多至一千五百金者

滕有盛年譜

漢按年譜偽戶曹傳某以滕有盛有才請于偽帥強任以鹽務赴菰溫兩溪發賣當時脅于威暴諒不止滕一人一事則亦無可奈何爾又按周聲灼貝子富公

恢復溫台處事實曾養性令黨征比錢糧正額外又派富戶餉銀至千餘兩者鞭箠痛哭之聲遍聞里巷又追取民間銅器毀寺觀銅鐘開偽局鑄錢文曰裕民鑄造大炮俱鑄左都督曾養性姓名嗣復檄押富戶數十人赴台營勒捐濟餉然則如此境界當時甌人實逼處此誠不堪一日耐也

康熙丁巳冬十月有海寇號劉將軍者復爲亂縛人索贖遲則剝腸棄屍瑞平沿江一帶遭災尤酷其時耿逆甫平繼有是亂人心惶恟有不可勝言也

王朝清雨憲瑣錄

十四年十一月初九日稟報招撫衢台溫處四府偽總兵

官等二百餘員 十五年丙辰三月初九報温州大捷斬
偽都督孫可德等並賊眾一萬餘人擒斬偽總兵副將何
賓等五百五十餘名 十月十四日報恢復溫處二府州
縣 武定李之芳平定耿逆記

陳倩字四玉授東甌學博山陰葉雷生有贈赴官詩

兩浙
輜軒

錄
陳訐號宋齋海甯人温州訓導上

李華江南人少以拒殺賊人亡命至京營充卒旂主奇其
勇優遇之華因投為漢軍尋旂主派管陵寢一日中秋夜
上與相臣步月微行至陵地守陵將卒俱歸獨華在

上以為問華曰陵寢重地曷敢去 上善之即守陵以官
官之累擢至溫鎮遂家焉尋陞福建都統終于任先是建
宅于溫 賜額榮祿第門前有大樟如蓋濃陰擎蔭康熙
壬寅六月十九日暴風拔木門前大樟亦折夫人憮然曰
是必有異未幾閩中凶問至矣公勇而有識以臺灣必叛
病中猶籌畫方略疏 上留中俄而臺逆果叛飛章至京
而公出缺摺亦適至 上因追取前疏以公病猶謀國痛
其溘逝乃敕歸其柩賜祭葬公十子三女崔制軍應階其
壻也

陳汝瀛
偶記

曾曰忠號澹園康熙時富耿變因思用世棄舉子業托身

臬掾考滿奉部截取選授仙遊縣尉

永嘉曾氏宗譜

漢按東甌詩存澹園以曾孫儒璋貴封中憲大夫

陸進字蓋思餘姚貢生官温州府訓導

餘姚縣志

按王嗣槐巢青閣序云蓋思浮沉諸生家亦中落逾年廩歲滿官廣文及之東甌每執手版庭謁上官上官耳其才名接以殊禮平生所著詩文盈尺許貧不能付剞劂上官分俸資給遴刻才十之三始得傳布行之

胡鴻鍾衡山縣人康熙廿一年樂清營千總

衡山志

謝立字與可天埴子官白水知縣能詩有自怡集

東甌詩存

梁社字介繁樂清貢生遭閩寇之亂蒼皇逃竄流寓三江稽遲閩越晚乃歸南郭之池上時邑令徐公化民欲與之交常避匿不與見公後獨携一僕造之謹然談詩終日而去

趙翊照梁介繁池上篇詩抄叙

甌婦女多能詩喜為吳下教俗生女三歲必纏足故甌女皆弓足可愛予寓甌有女狀元周菊香善詩文尤妙解音律結十番社詩社於城西一題出倡和者多至數百人皆閨中傑也自摘其佳句錄之詠蓮居寺竹云春苞和露坼秋影帶煙浮山行云野燒留樵路村樓隔爨烟山花云紅墮無人處青成有脚春野望云斷雁續殘影孤雲界遠山

霜閨云冰凍有時敲玉筋
蓬寒無計下金釵
村居云山花
無語隨春老
明月多情照
客眠靜春齋
閒詠云紈扇
因風輕
蛺蝶疎
兼有月淡
梅花詩思
雋永直不減
班香薛艷矣

遊颺紀聞

高國字觀上

永諸生

有遊五美園詩

馬浩字遵素

永拔貢

張顯謨字

毓文號東山永附貢

有遊雁蕩詩

陳之恕

字道源永廩著籍園雜詠

趙圯

永諸生

中和集

題相舟清咏集為陳母鄭夫人賦

○

瑤臺水雪點寒雲鳴咽星霜不忍聞春樹

啼鵲殘血冷畫巢乳燕夕陽曛和九婺緯聲初歇剪燭霜幃夜未分泉穴餘生何足惜從容九地可逢君

邵灝字相文號相岡

石門教諭

陳小蘭汪錦蘭俱永嘉人小蘭才色兼美許字未嫁而寡

父母欲強嫁之女曰以女之才而不得相一名士甯守死不嫁有對能對者字之曰烏恨春歸啣住落花啼不得至今十餘年無人能對者某邑宰子作虞美人花詩和者極多俱不甚佳惟閨秀汪景蘭一首獨絕詩云春殘歷亂滿園陳芳草空憐姓字真豔質不垂紅粉淚嬌姿猶學細腰人庭前拍掌迎風笑咳下聞歌翠黛顰開遍江南與江北倩誰為賦洛川神

遊颺紀聞

靈睿和尚太平鍾氏子方授室遁去為僧嘗修懺永嘉

寺中一老禪自稱宋懺主慈雲大師端坐聽講畢舉古木

香爐贈師曰善持之忽不見由是發明若有神助和尚字

攝菴三台詩錄

閣學周蘭坡曾主東山講席有聯云譚道折將松作塵沒
泉携得月卽瓶後典試江蘇得人甚盛曹印稿

漢按商氏越風學士在永嘉學署有和蘇詩百餘首最

佳又全浙詩話蘭坡名長發山陰人雍正甲辰進士

董基字初之昌化人雍正元年舉孝廉方正官温州府學

訓導兩浙輔軒錄

漢按郡志作童基

陸汝欽字恪庭官温州教授錢仁榮曰恪庭教授温兼主

東山書院郡邑士咸樂育焉上

侯嗣宗樂清詩人著漁村詩集嗣宗死貧不能具棺殮其

家人持一硯鬻於市冀有售之者楊衡子聞而哀之為之

畢喪事詩文書畫皆卓然可傳獨以性不諧俗多為人所

怪卒至於無所遇而貧病以死良哉韓則愈漁邨集序

陳岳基雍正初以事譴戍烏魯木齊携一愛妾往妾旋卒

及遇赦負妾骸歸既抵家潛置妾骸西郊清明橋下數日

謀葬往取之則妾骸已無有矣蓋為收暴露者採取去岳

基一慟幾絕萬餘里路不辭艱苦負以偕歸一旦失之家

門之外詎不可痛苦岳基者可謂情深義至矣曾潛溪太學述

佛第號心空本名項世臣遂昌應祥中丞孫為邑諸生尋

棄去事佛駐錫甌之仙岩工詩有梅花百詠陳世脩

彬遠字秋蟾號嘯翁永嘉人杭州東郊栖禪院僧清波小

志杭州笑隱菴詩僧笑管其徒彬遠奕是俱詩彬遠別

字秋蟾詩尤起縱大有青蓮風味兩浙輶軒錄

按碧谿詩話嘯翁所著詩刻以流傳者有村居以後

詩三卷

胡耀庚字元白鄞縣八平陽訓導寧波府志

仙巖天目和尚有戒行能詩所交多文人徐凝有訪天

和尚詩五安上有輓天目和尚詩繼此而還有智嵩及一

戒二和尚亦善韻語仙巖名刹得此誠多生色妙果僧悟一記

國朝雍正魯之堂順天梁城所吏由温州經歷任建昌府

經歷南城縣志

聞弼平陽人洪武間任江西崇仁縣崇仁志

余玘永嘉人嘉靖八年任德興知縣饒州府志

沈光宗永嘉進士萬曆二十三年任浮梁知縣上全

姜傑瑞安監生崇正間任浮梁知縣上全

曹應薦永嘉人崇正間任鄱陽吏目上全

鮑榮身平陽人崇正間任鄱陽吏目上全

徐浚貴溪人弘治進士由福州丞歷温州知府多善政擢

四川參政貴溪縣志

明

清

張伯壽德興人永樂貢士任樂清知縣

饒州府志

黃元吉貴溪人嘉靖舉人由河南元武縣升温州同知

黃溪縣志

汪世清貴溪人嘉靖選貢任永嘉教諭

上全

方澄澈貴溪人貢士隆慶間任温州通判

上全

詹隆祖貴溪人瑞安主簿

全

朱悅瑞安人嘉靖監生

平陽府志 七年任長樂訓導

平陽志有此人

北明樂清監司

典史徐應鯉永嘉人崇禎元年任

魏玓長樂人

縣丞倪文龍平陽人

嘉慶八年任

魏大斌

乾隆五十年由澎湖協陞浙江

劉繼貞

平陽人平陽縣丞以上長樂縣志

温州府